

"Službeni glasnik BiH", broj:51/12

Na osnovu člana 10. stav (2) Zakona o duhanu Bosne i Hercegovine ("Službeni glasnik BiH", broj 32/10) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), a na prijedlog Ministarstva vanjske trgovine i ekonomskih odnosa Bosne i Hercegovine, Vijeće ministara Bosne i Hercegovine, na 7. sjednici održanoj 10. maja 2012. godine, donijelo je

PRAVILNIK O UVJETIMA ZA OBAVLJANJE DJELATNOSTI OTKUPA I OBRADU DUHANA

POGLAVLJE I - OPĆE ODREDBE

Član 1.

(Predmet Pravilnika)

Ovim Pravilnikom uređuju se:

- a) uvjeti koje organizator proizvodnje ili obrađivač duhana mora ispunjavati da bi se bavio otkupom i obradom sirovog duhana,
- b) vođenje evidencija i izvještaji organizatora proizvodnje i obrađivača duhana.

Član 2.

(Sadržaj, oblik i način vođenja

Registra organizatora proizvodnje i obrađivača duhana)

Sadržaj obrazaca i način vođenja Registra organizatora proizvodnje i obrađivača duhana u Bosni i Hercegovini propisuje ministar vanjske trgovine i ekonomskih odnosa Bosne i Hercegovine, u skladu sa članom 36. Zakona o duhanu Bosne i Hercegovine ("Službeni glasnik BiH", broj 32/10) (u daljem tekstu: Zakon o duhanu), Registrom poljoprivrednih gazdinstava i/ili Registrom klijenata Bosne i Hercegovine, propisanih Zakonom o poljoprivredi, prehrani i ruralnom razvoju Bosne i Hercegovine ("Službeni glasnik BiH", broj 50/08).

POGLAVLJE II - UVJETI ZA OBAVLJANJE DJELATNOSTI OTKUPA I OBRADU DUHANA

Član 3.

(Obrađivač duhana)

Djelatnost obrade duhana mogu obavljati pravna lica koja imaju sjedište u Bosni i Hercegovini i koja ispunjavaju uvjete propisane članom 10. Zakona o duhanu i ovim Pravilnikom.

Član 4.

(Otkup i obrada duhana)

- (1) Pod otkupom duhana smatra se preuzimanje sirovog duhana u listu od proizvođača duhana i procjena kvaliteta tog duhana.
- (2) Pod obradom duhana podrazumijeva se sređivanje i industrijska fermentacija duhana, te druge radnje u tehnološkom postupku obrade i pakovanja duhana.

Član 5.

(Uvjeti za registriranje djelatnosti otkupa i obrade duhana)

- (1) Da bi određeno pravno lice moglo vršiti otkup sirovog duhana, treba da ispunjava sljedeće uvjete:
 - a) da raspolaže odgovarajućim prostorom za smještaj i čuvanje;
 - b) da raspolaže odgovarajućim stručnim kadrom;
 - c) da sa proizvođačem duhana zaključi pisani ugovor o proizvodnji i isporuci duhana;
 - d) da sa obrađivačem duhana zaključi pisani ugovor o obradi sirovog duhana u listu.
- (2) Da bi određeno pravno lice moglo vršiti obradu duhana, treba da ispunjava sljedeće uvjete:
 - a) da raspolaže odgovarajućim prostorom za obradu duhana;
 - b) da raspolaže odgovarajućom tehnološkom opremom;
 - c) da osigura laboratorijske analize duhana;
 - d) da raspolaže odgovarajućim stručnim kadrom;
 - e) da zaključi pisani ugovor o isporuci duhana sa organizatorom proizvodnje koji se bavi samo otkupom, a ne i obradom duhana, ili pisani ugovor o obradi duhana, u slučaju da vrši uslugu obrade duhana.

"Službeni glasnik BiH", broj:51/12

Član 6.

(Prostor i oprema za obradu duhana)

Prostor za obradu duhana jedinstvena je tehnička i tehnološka cjelina koja sadrži:

- a) *skladište za otkupljeni duhan* - prostor za odlaganje otkupljenog duhana u količini dovoljnoj za nesmetani prihvrat otkupljenog duhana, te za njegovo razvrstavanje i odlaganje radi daljih postupaka u obradi;
- b) *skladište za pripremu duhana* - namijenjeno je za skladištenje duhana u skladu sa zahtjevima sistema koji obrađivač koristi za pripreme duhana za finalnu obradu, u količini dovoljnoj za nesmetano odvijanje finalne obrade duhana;
- c) *opremu u liniji za obradu duhana* - sastoji se od dijelova za:
 - 1) miješanje (blendiranje) i prebiranje (sortiranje) lista duhana;
 - 2) iziljavanje (stripsiranje) ili kaboširanje za hercegovački ravnjak;
 - 3) industrijsku fermentaciju i kondicioniranje iziljenog duhana (redryer);
 - 4) pakiranje iziljenog duhana;
 - 5) sušenje i pakiranje izdvojene lisne nervature (rebra).
- d) *skladište repromaterijala* - prostor namijenjen skladištenju količina repromaterijala dovoljnih za nesmetano odvijanje obrade duhana; skladište repromaterijala mora udovoljiti uvjetima za skladištenje kartonske ambalaže i hemijskih preparata;
- e) *opremu i prostor za nadzor kvaliteta* - laboratorij za analizu;
- f) *skladište gotove robe* - prostor za čuvanje gotovih proizvoda obrade duhana u raznim oblicima pakovanja; skladište mora biti prilagođeno za fumigaciju gotovih proizvoda
- g) energetska postrojenja.

Član 7.

(Oprema za blendiranje i sortiranje)

Oprema za miješanje (blendiranje) i prebiranje (sortiranje) lista sastoji se od:

- a) stolova za miješanje;
- b) stolova za prebiranje;
- c) uređaja za praćenje protoka duhana;
- d) opreme za obesprašivanje i kondicioniranje duhana.

Član 8.

(Oprema za iziljavanje/kaboširanje)

Oprema za iziljavanje duhana (stripsiranje) sastoji se od:

- a) dozirne tračne vage;
- b) cilindra za kondicioniranje;
- c) uređaja za pravilno raspoređivanje duhana;
- d) linije za iziljavanje;
- e) linije za izdvajanje dijelova plojke (stripsa), klasifikatora;
- f) sistema sita za izdvajanje sitnjavine.

Član 9.

(Oprema za industrijsku fermentaciju i kondicioniranje iziljenog duhana)

Oprema za industrijsku fermentaciju i kondicioniranje iziljenog duhana sastoji se od:

- a) uređaja za pravilno raspoređivanje duhana;
- b) tunela za dosušivanje i kondicioniranje duhana (redryer);
- c) instrumenata za mjerenje vlage i temperaturnih režima tokom industrijske fermentacije.

Član 10.

(Oprema za pakiranje iziljenog duhana)

Oprema za pakovanje iziljenog duhana sastoji se od:

- a) prese;
- b) kontrolne vage.

Član 11.

(Oprema za sušenje i pakiranje izdvojene lisne nervature (rebra) i sitnjavine)

Oprema za sušenje i pakiranje izdvojene lisne nervature (rebra) i sitnjavine sastoji se od linije sa uređajima za sušenje, prosijavanje i presovanje rebra i duhanske sitnjavine.

"Službeni glasnik BiH", broj:51/12

Član 12.

(Oprema za obradu duhana)

Oprema za obradu duhana mora osigurati da se prilikom iziljavanja duhana postiže optimalni kvalitet strukture stripsa po veličini, primjerene čistoće i sa udjelom frakcija na situ manjih od 0,5 mm najviše od 1,5% (duhanska prašina).

Član 13.

(Energetsko postrojenje obrađivača duhana)

U sklopu energetskih postrojenja obrađivač treba osigurati opskrbu i distribuciju vodene pare i komprimiranog zraka.

Član 14.

(Stručni kadar u obradi duhana)

Za vođenje postupka obrade duhana, te nadzor nad kvalitetom obrađenog duhana, obrađivač duhana mora imati u stalnom radnom odnosu zaposlena najmanje dva stručnjaka VSS agronomskog smjera.

Član 15.

(Prostor i oprema za testiranje i standardi za obavljanje analiza)

Za nadzor nad kvalitetom proizvoda obrađivač mora raspolagati prostorom i opremom za testiranje i obavljanje analiza, i to:

- a) frakcijskog sastava iziljenog duhana, na način koji je propisan BAS-ISO standardom 12194;
- b) sadržaja rebra u stripsu, na način koji je propisan BAS - ISO standardom 12195;
- c) vlage i temperature u stripsu, rebru i sitnjavini.

Član 16.

(Rješenje o ispunjenju uvjeta za obavljanje djelatnosti otkupa i obrade duhanskih proizvoda)

- (1) Nadležni organ na zahtjev pravnog lica, po ispunjenju uvjeta propisanih ovim Pravilnikom i potvrde da odgovorno lice u privrednom subjektu u posljednje tri godine koje prethode danu podnošenja zahteva nije pravnosnažno osuđeno za krivično djelo nedozvoljene proizvodnje duhana, odnosno nedozvoljene trgovine duhanom ili fermentisanim duhanom, izdaje Rješenje o ispunjenju uvjeta za obavljanje djelatnosti otkupa i obrade duhanskih proizvoda.
- (2) Ukoliko nadležni organ ustanovi da podnosilac zahtjeva ne ispunjava uvjete, donosi rješenje kojim se zahtjev odbija.
- (3) Protiv ovog rješenja može se podnijeti žalba nadležnom organu u roku od 15 dana od dana dostavljanja.

Član 17.

(Vremenski period važenja rješenja)

Rješenje iz člana 16. izdaje se najduže na period od pet godina.

Član 18.

(Obnavljanje rješenja)

- (1) Organizator proizvodnje ili obrađivač duhana može da obnovi Rješenje o ispunjavanju uvjeta za obavljanje djelatnosti podnošenjem zahtjeva najkasnije 60 dana prije isteka roka važenja postojećeg rješenja.
- (2) Podnošenje zahtjeva za obnavljanje Rješenja iz stava (1) ovog člana vrši se pod uvjetima i na način propisanim za njegovo izdavanje.
- (3) Nadležni organ je dužan da u roku od 30 dana od dana podnošenja zahtjeva za obnavljanje rješenja, a najkasnije do dana isteka roka važenja postojećeg rješenja, odluči po zahtjevu podnosioca.
- (4) Ako nadležni organ ne odluči po zahtjevu u roku iz stava (3) ovog člana, organizator proizvodnje ili obrađivač duhana ima pravo da nastavi da obavlja djelatnost u skladu sa postojećim rješenjem.

Član 19.

(Rješenje o oduzimanju dozvole za otkup i obradu duhana)

- (1) Rješenje kojim se ustanovljava da određeno pravno lice ispunjava uvjete za otkup i obradu duhana oduzima se:
 - a) na zahtjev imaoca rješenja;
 - b) ako imalac rješenja prestane da ispunjava uvjete propisane ovim Pravilnikom;
 - c) ako je odgovorno lice imaoca rješenja pravnosnažno osuđeno za krivično djelo nedozvoljene proizvodnje, odnosno nedozvoljene trgovine duhanom ili fermentisanim duhanom, a i dalje ostane na poslovima lica ovlaštenog za zastupanje.
- (2) Nadležni organ je dužan da u roku od osam dana od dana nastupanja činjenice utvrđene u stavu (1) ovog člana donese rješenje o oduzimanju dozvole za otkup i obradu duhana.

"Službeni glasnik BiH", broj:51/12

Član 20.

(Upis u Registar organizatora proizvodnje i obrađivača duhana)

- (1) Organizator proizvodnje ili obrađivač duhana obavezan je da izvrši upis u Registar organizatora proizvodnje i obrađivača duhana 15 dana nakon dobijanja rješenja iz člana 16. stav (1) ovog Pravilnika.
- (2) Način upisa u Registar organizatora proizvodnje i obrađivača duhana propisan je Pravilnikom o sadržaju obrazaca i načinu vođenja registara, u skladu sa članom 36. Zakona o duhanu.

POGLAVLJE III - VRIJEME OTKUPA DUHANA

Član 21.

(Vrijeme otkupa duhana)

- (1) Otkup duhana tipa virdžinija počinje polovinom augusta i traje sve do 15. novembra tekuće godine.
- (2) Otkup duhana tipa berlej počinje početkom novembra i traje sve do 31. januara naredne godine.
- (3) Otkup duhana tipa hercegovački ravnjak počinje početkom decembra i traje do 31. januara naredne godine.
- (4) Organizatori proizvodnje i obrađivači mogu, ukoliko se ukaže potreba, početi otkup i prije roka koji je naveden u ovom pravilniku.

Član 22.

(Obaveza otkupa duhana)

Organizator proizvodnje ili obrađivač duhana obavezan je da u vrijeme otkupa duhana od proizvođača duhana sa kojim je sklopio ugovor o proizvodnji i isporuci otkupi sve količine proizvedenog duhana.

POGLAVLJE IV- MJERILA ZA PROCJENU KVALITETA SIROVOG DUHANA

Član 23.

(Kvalitet sirovog duhana)

- (1) Količina i kvalitet sirovog duhana u listu procjenjuje se na licu mjesta, prilikom preuzimanja sirovog duhana od strane lica ili komisije zadužene za vršenje procjene.
- (2) Mjerila za procjenu kvaliteta i klasa sirovog duhana propisana su Pravilnikom o mjerilima procjene kvaliteta sirovog duhana Zakona o duhanu.

Član 24.

(Klase sirovog duhana)

- (1) Organizator proizvodnje ili obrađivač duhana neposredno pred početak otkupa formira komisiju od tri člana, koja vrši procjenu uzoraka količina i klasa sirovog duhana.
- (2) Komisija iz prethodnog stava, kada odredi klase sirovog duhana, iste pečati i stavlja na oglasnu tablu na liniji za otkup sirovog duhana, kako bi proizvođači duhana imali uvid u klase sirovog duhana za tekuću godinu.

Član 25.

(Komisija za procjenu sirovog duhana)

- (1) Komisija iz člana 24. stav (1) broji tri člana, a u njoj se nalazi najmanje jedan inženjer poljoprivrednog smjera VII stepena i posjeduje najmanje tri godine iskustva na poslovima proizvodnje, obrade ili otkupa duhana.
- (2) Komisiju za procjenu uzoraka duhana kod organizatora proizvodnje ili obrađivača imenuje odgovorno lice.
- (3) Dva ili više organizatora proizvodnje ili obrađivača duhana mogu zajednički formirati komisiju za procjenu uzoraka klasa duhana, ukoliko im se za to ukaže potreba.

Član 26.

(Procjena kvaliteta sirovog duhana u listu)

Procjenu kvaliteta sirovog duhana u listu, u skladu sa članom 15. Zakona o duhanu, vrši procjenitelj ili komisija.

Član 27.

(Potvrda o otkupljenim količinama i klasama duhana)

- (1) Organizator proizvodnje ili obrađivač, nakon izvršene cjelokupne procjene količine i kvaliteta duhana, izdaje proizvođaču duhana Potvrdu o otkupljenim količinama i kvalitetu (klasama) duhana.
- (2) Organizator proizvodnje ili obrađivač duhan je za svakog proizvođača odvojeno voditi evidencije o otkupljenim količinama duhana sa naznačenim klasama i sortama duhana, i čuvati ih pet godina.
- (3) Forma i elementi koje sadrži Potvrda iz stava (1) ovog člana sastavni su dio Pravilnika o sadržaju obrazaca i načinu vođenja registara.

"Službeni glasnik BiH", broj:51/12

Član 28.

(Prigovor o izvršenoj procjeni sirovog duhana u listu)

- (1) Ukoliko je proizvođač duhana nezadovoljan izvršenom procjenom sirovog duhana u listu tokom vegetacije ili procjenom kvaliteta sirovog duhana u listu od strane odgovornog lica ili komisije organizatora proizvodnje ili obrađivača duhana, može podnijeti prigovor da se izvrši procjena sirovog duhana u listu komisijski.
- (2) Duhan čija se procjena traži putem komisije biće odvojen od ostalog duhana proizvođača i nalaziće se na čuvanju kod organizatora proizvodnje ili obrađivača duhana.

Član 29.

(Prigovor o izvršenoj procjeni)

Proizvođač duhana koji je nezadovoljan izvršenom procjenom podnosi prigovor nadležnom organu u roku od 8 dana od dana izvršene procjene.

Član 30.

(Komisija za procjenu osporenog duhana)

Nakon zaprimljnog prigovora, nadležni organ u roku od tri dana formira komisiju za procjenu osporenog duhana, koja broji tri člana, i u koju se imenuje najmanje po jedan član od strane proizvođača duhana, organizatora proizvodnje ili obrađivača duhana i predsjednika komisije od strane nadležnog organa.

Član 31.

(Troškovi za rad komisije)

Sve troškove za rad komisije snosi lice koje je pogrešno izvršilo procjenu, a što je ustanovila komisija iz člana 30. ovog Pravilnika i dužan je iste uplatiti na račun nadležnog organa u roku od osam dana od izvršene procjene duhana od strane komisije.

POGLAVLJE V- EVIDENCIJE OTKUPA

Član 32.

(Evidencije o otkupljenom duhanu i izvještaj nadležnom organu
o količini i klasama otkupljenog duhana)

- (1) Organizator proizvodnje ili obrađivač duhana dužan je za svakog proizvođača odvojeno, od dana početka otkupa, voditi evidenciju preuzetog, odnosno otkupljenog duhana po klasama, sortama duhana i ukupnoj količini.
- (2) Organizator proizvodnje ili obrađivač duhana dužan je da u roku od 15 dana od dana završenog otkupa duhana podnese izvještaj nadležnom organu o količini, klasama i sortama otkupljenog duhana.

Član 33.

(Izvještaj o nepredatim količinama duhana)

Organizator proizvodnje ili obrađivač duhana dužan je da u roku od 15 dana od dana završenog otkupa dostavi nadležnom organu izvještaj o ugovorenim a neisporučenim količinama duhana, osim ako je neisporučivanje posljedica elementarne nepogode (poplava, led, grad ili rani mraz).

Član 34.

(Evidencije o količini proizvedenog i preuzetog duhana)

Organizator proizvodnje ili obrađivač duhana dužan je voditi odvojene skladišne i druge evidencije o količini proizvedenog duhana iz vlastite proizvodnje, odnosno preuzetog duhana iz ugovorene proizvodnje.

Član 35.

(Evidencija o neobrađenom i obrađenom duhanu)

Organizator proizvodnje ili obrađivač duhana, dužan je voditi odvojene evidencije o neobrađenim i obrađenim količinama duhana, za svaku kalendarsku godinu posebno.

Član 36.

(Izvještavanje o podacima evidencija)

Obrađivači duhana dužni su izvijestiti o podacima koji sadrže evidencije iz člana 32, 33, 34. i 35. ovog Pravilnika na način i za razdoblje koje od njih zatraži nadležni organ.

"Službeni glasnik BiH", broj:51/12

Član 37.

(Forma i elementi evidencija)

- (1) Organizatori proizvodnje ili obrađivači duhana dužni su obrasce iz članova 32, 33, 34. i 35 ovog Pravilnika čuvati pet godina.
- (2) Forma i elementi koje sadrže evidencije iz članova 32, 33, 34. i 35. sastavni su dio Pravilnika o sadržaju obrazaca i načinu vođenja registara, u skladu sa članom 21. stav (3) i članom 37. Zakona o duhanu.

POGLAVLJE VI - PRIJELAZNE I ZAVRŠNE ODREDBE

Član 38.

(Usklađivanje uvjeta za obavljanje djelatnosti proizvodnje i obrade duhana)

Organizator proizvodnje ili obrađivač duhana, koji je u trenutku stupanja na snagu Zakona o duhanu obavljao djelatnost proizvodnje i obrade duhana, dužan je uskladiti sve uvjete za obavljanje djelatnosti proizvodnje i obrade duhana sa odredbama ovog Pravilnika, u roku od 6 mjeseci od dana usvajanja Pravilnika.

Član 39.

(Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".

VM broj 81/12
10. maja 2012. godine
Sarajevo

Predsjedavajući Vijeća ministara BiH **Vjekoslav Bevanda**, s. r.